

mengetuai suatu pemberontakan yang cuba melucutkan segala kuasa daripada kerabat diraja Minangkabau. Dia sendiri mengambil alih jawatan Raja Adat dan Raja Ibadat. Kepentingan gelaran Raja Adat lenyap apabila pihak Belanda mengambil alih kuasa di Minangkabau pada tahun 1838. [*lih. j. GERAKAN PADRI, RAJA ALAM*]

RAJA AHMAD RAJA ISMAIL *lih. R.A. NIZA*

RAJA ADAT, gelaran pemerintah Minangkabau, pada abad ke-16. Berdasarkan *Kaba Cindua Mato* iaitu teks tradisional Minangkabau, terdapat tiga orang pemerintah Minangkabau, dan setiap seorang menguasai kawasan perlombongan emas. Raja Ibadat bersemayam di Sumpur Kudus, Raja Alam bersemayam di Pagarruyung dan Raja Adat bersemayam di Buo, di Sungai Sinamar. Ketiga-tiga pemerintah ini dikenal sebagai Raja nan Tigo Selo.

Satu tradisi yang lain pula menyebut bahawa Raja Adat yang pertama adalah saudara kandung perempuan kepada pemerintah Pagarruyung. Ada kemungkinan gelaran ini disandang oleh seorang perempuan kerana dalam budaya Minangkabau, perihal saka iaitu leluhur daripada sebelah ibu amat dipentingkan. Dalam *Kaba Cindua Mato*, Raja Adat dan Raja Ibadat yang disebutkan sebagai Raja nan Duo Selo, membayangkan kemungkinan wujud dua atau tiga bahagian yang lain lagi. Tiga dibahagi dengan dua adalah tema yang biasa terdapat dalam tradisi Minangkabau, dan gabungan Raja nan Tigo Selo dengan Raja nan Dua Selo mungkin mewakili keseluruhan masyarakat Minangkabau, dengan prinsip ketiga memegang erat yang dua lagi.

Sumber awal Eropah tidak pernah menyebut gelaran Raja Adat secara khusus, tetapi dipercayai bahawa pada akhir abad ke-17, kerabat diraja tertentu telah berpindah ke bahagian barat dan mewujudkan sebuah pusat yang baharu di kawasan Pagarruyung seperti yang terdapat pada hari ini. Raja Alam membina tempat semayamnya di sini, manakala Raja Ibadat pula bersemayam di Suruaso. Seorang wakil keluarga tinggal di Buo, yang terdahulunya menjadi tempat bersemayam Raja Adat. Baginda dianugerahkan gelaran Raja di Buo. Gelaran Raja Adat kemudian diberikan secara bergilir kepada para isteri Raja Alam dan Raja Ibadat. Peranan beristiadat dipegang oleh Puteri Jamilan selama beberapa ketika. Ini merupakan gelaran kemuliaan yang diberikan kepada para ibu kedua-dua Raja Alam dan Raja Ibadat. Walaupun begitu, pada abad ke-18, kedudukan Raja Adat telah menjadi penting semula.

Pada awal abad ke-19, apabila Gerakan Padri meletus, Tuanku Lintau, salah seorang pemimpin gerakan tersebut,